

Date – 22/04/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Home Minister Pu K. Sapdanga hovin vawiin khan KMMTTP leh Rel lo lut in Mizoram a nghawng dan tur zir ho a ni.
2. Rajya Sabha MP Pu K. Vanlalvena chuan Mizo hnahthlak tam takte ti hrangtu chu tawng inang lo a ni a ti.
3. Pahalgam firfiakte beih cham vawi khatna vawiin khan rampumah hriatrengna hun hman a ni.
4. Naktuka West Bengal Assembly inthlan thawhkhatna leh Tamil Nadu Assembly inthlan vote thlak turin inbuatsaihna peihfel a ni tawh.



HM

Home Minister Pu K. Sapdanga hovin vawiin khan KMMTTP leh Rel lo lut in Mizoram a nghawng dan tur zir ho a ni.

Aijal Club-ah Pu K. Sapdanga bakah Adviser to CM pahnih Pu Lalmuanpuia Punte leh Pu TBC Lalvenchhunga te, MLA Lt.Col. Clement Lalhmingthanga te an tel a. Sawm bik mi 90 mithiam hrang hrang, NGO hrang hrang aiawh te. Mara leh Lai zirlai pawl te leh zirlai engemaw zat an tel a.

He hun buatsaihtu Study Committee Chairman Pu T. Lalhlimpuia, MLA chuan, Mizo te inralrinna dar an vua tih sawiin KMMTTP hawn mai tur leh Rel lo lut in a Zoram a nghawng theih dan thlirin engtin nge an inbuatsaih thiam ang tih chu zir ho a ngai tih a sawi a ni.

Vawiin hun hmanah hian inkalpawhna kawng lian leh pawimawh takin a nghawng theih leh Mizoram hmathlir hrang hrang te an sawi ho a ni.



AMC POLLING

Mizoram State Election Commissioner Dr. H. Lalthlangliana chuan duhthusam ang thlap ni lo mah se AMC a vote tla zat zaa 62.77 chu a tha thawkhat a ti.

Akashvani News Aizawl zawhna chhangin Mizoram State Election Commissioner Dr. H. Lalthlangliana chuan Home Voting te nen an belhkhawm hnuah, vote tla zat chu zaa 62.77 a ni tih a sawi a, tun tumah hian Election Commission of India hnuaiia Duty vangin sipai tam tak an zin chhuak a, anni tan hian Postal Ballot a vote thlak theih a ni si lo a, hei hi vote thlak lo an tam chhan niin a sawi a, AMC chu ECI nen an inzawm loh avangin Postal Ballot hi sipai tan hman theih a ni lo tih a sawi bawk.

Dr H. Lalthlangliana chuan, nimina vote thlak lai khan Aizawl khawpui hmun hrang hrang an tlawh kual a, an beisei phak bakin Mizoram People Forum (MPF) puihna an dawng tha a, anni zarah boruak muanawm tak hnuaiiah inthlan a ni, a ti a. Karleh ni 27 ah vote chhiar hun pawh fan anih chhan chu Mizorama kohhran lian ber Presbyterian Kohhran Bial Inkhawmpui tibuai lo tua ruahman a ni tih a sawi a, tun kar tawpa Bial Inkhawmpui a zawh chuan kohhran ti buai loin vote an chhiar thei dawn niin a sawi bawk a ni.

(Byte: Dr. H. Lalthlangliana)

Kan corr report lo ngaithla ang.

Nimina Aizawl Municipal Corporation (AMC) inthlan ah vote za zela 62.77% a tla a. nimina polling station a vote tla zawng zawng zat chu za zela 61.14 % niin Home Voting leh PED vote thlak nen a vaiin za zela 62.77 % vote a tla a ni.

Aizawl Municipal Corporation inthlan hi AMC inthlan vawi 3 lo neih tawh te nena khaikhinin tun tuma inthlanah hian vote a tla tlem ber a, kum 2010 khan vote zaa 63.60% tla in kum 2015 khan zaa 63.55% vote a tla thung a, kum 2021 ah vote zaa 64.19% tla in tun tumah hian 62.77% a tla a ni.

Aizawl Municipal Corporation Inthlanpui, 2026-a vote tla te hi Deputy Commissioner & District Municipal Election Officer, Aizawl District Office-a Counting Hall 4-ah te chhiar a ni dawn a.

State Election Commission chuan boruak muanawm tak hnuaiia vote tla te chhiar a nih theih nan leh result te tluang taka puan a nih theih nan political party zawng zawngte chu boruak tha lo ti chhuak thei laka insum turin a ngen a ni.

<><><>

MP

Rajya Sabha MP Pu K. Vanlalvena chuan Mizo hnahthlak tam takte ti hrangtu chu tawng inang lo a ni a ti.

He thu hi nimina New Lamka EBC Centenary Hall-a Zofate Insuihkhawm Seminar a hmanpuinaah sawiin, Pu K. Vanlalvena chuan Pathian thuah pawh tawng hrang vangin Van chena insak tum te tih hran an lo ni tawh tih sawiin, Mizo te pawh tawngin min ti darhtu chu keimahni tih ni loin Pathian tih a ni tih a sawi a.

Chuvang chuan, mahni tawng hmangaih vak te, mahni tawng ang thiam ve lo kan en hrang thin te hi sual lian pui a ni hran lo niin a sawi bawk.

(Byte: Pu K. Vanlalvena)

Pu K. Vanlalvena chuan Mizo hnahtlak te insuihkhawm a, inpumkhat tak tak tur chuan tawng inhriat tawn a pawimawh a ti a, eng tawng pawh hmang ila tawng in ngaihnepsak tute nen chuan inpumkhat a harsa niin a sawi.

MP Pu K. Vanlalvena chuan Mizote hmun hrang hranga awm te insuihkhawm chu a pawimawh a, hnam inpumkhatna chu Politics a vote zawinna avangin a chhiat phah chang awm mahse, inpumkhat nan chuan vote pawh chan ngam a ngai a ni a ti.

Adviser to Chief Minister (Political) Pu Lalmuanpuia Punte pawhin he hunah hian thu sawiin 'Mizo Tawng' chu Duhlian Tawng emaw Lusei Tawng emaw ti a vuah anih chuan Mizo inpumkhatna a that lehzuat a ring tih a sawi.

(Byte: Pu Lalmuanpuia Punte.)

Pu Lalmuanpuia Punte chuan Manipur a Zo-hnahtlak awmte chu Mizoram atanga kaih chhuah nghawt theih an ni lo a, anmahni an au chhuah ve a pawimawh tih a sawi bawk a ni.

<><><>

GYAN BHARAT MISSION

Sorkar laipui Ministry of Culture hnuai hmalaknaa rampum huapa kut ziaik (manuscript) hlui zawn chhuah leh vawnthat tumna on Gyan Bharatam Mission kalpui turin vawiin khan District hrang hrangah DC te kaihhruaiin an thukhawm a.

Serchhip District Level Committee on Gyan Bharatam Mission chu, an Chairman District Bawrsap Pu Paul L. Khuma hovin DC Meeting Hall-ah an thukhawm a, Meeting-ah hian 'Gyan Bharatam Mobile Application' siam a nih thu tarlan a ni a, mi tu pawh, mimal leh pawl emaw, thu ziaik hlui report tur neite chuan he Mobile Application kaltlang hian an theh luh theih vek a. Mipuite'n he Application hi an hmelhriat a pawimawh thu tarlan niin heng Manuscript-te hi a neitute remtihna thlapin uluk taka thla lak a, a Soft Copy chauh vawnhim tura lak tur niin, a tak (original) chu a neitute kutah a awm zui zel tur a ni an ti,

Tun dinhmunah Mizoram chuan Mobile Application kaltlang hian survey request - 2, Manuscript - 28 nei mekin, N.E state-ah Manuscript report la nei tlem ber a ni.

Mamit ah pawh DC Conference Hall, Mamit-ah Mamit District level Committee on Gyan Bharatam Mission chu Pi Carolyn LB Khiangte, Addl DC hoin an thukhawm. Committee chuan he mission atan SDO(Sadar) chu district nodal officer/ coordinator atan ruatin a zau thei ang bera mipuite hnena he mission chungchang puang darh turin khawtlang hruaitute, NGO, zirna in te chu hmala tura ngen an ni.

Saitual District Level Committee on Gyan Bharatam Mission chu District Bawrsap Pu Srinivas Sadi kaihhruaiin an thu khawm a, Gyan Bharatam Mission kal

tlanga District level-a hmanlai kutziak (manuscript) humhalh nana hmalak dan tur te sawiho a ni.

He huna tarlan anih danin, Manuscript ni tur chuan kum 75-a upa, kutziak ngeia thuziak a ni tur a ni a, hnah thel, lehkhapuan siam chawp, puan, thing emaw thira ziah a ni tur a ni.

Hnahthialah pawh DC Meeting Hall-ah District Bawrhsap Pi K. Vanlalruati kaihruaiin District Level Committee on Gyan Bharatam Mission an thukhawm a. He hunah hian Hnahthial District chhunga Gyan Bharatam Mission chungchang inhrilhfiahna hun leh hemi hnuaiia hmalak tur hrang hrang sawi ho a ni.

<><><>

PWD ASSESSMENT

Social Welfare , Women & Child Development Department leh Health & Family Welfare Department te hmalakna hnuaiia vawiin khan Thenhlu mah vohbikte tan Assessment & Certification Camp buatsaih a ni a. He camp-ah hian khaw 7 atangin Disability Certificate / UDID pek chhuah tur vohbik 62 te endik an ni.

He Assessment & Certification Camp hi Dr. Joseph Lalrindika Chongthu kaihruaina hnuaiia neih niin, Social Welfare, Women & Child Development Department staff te, Zoram Medical College & Hospital, Falkawn atangin medical team te, Lunglei Civil Hospital atanga medical team te an tel a ni.

Vohbikte tan Assessment & Certification Camp hi naktuk ni 23 April hian Lungsen II ah leh naktip ni 24 khian Tlabung ah neih chhunzawm tura ruahman a ni..

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

APEX BANK

Mizoram Cooperative Apex Bank Ltd. chuan ‘Scheduled Bank’ status a hmu thar a. Second Schedule of Reserve Bank of India Act, 1934 ah telh a ni dawn ta a ni.

Apex Bank hi kum 1982 July ni 31 khan mi thahnemngai ten Mizo mipuite tan an din a ni a, hma sawn zelin Scheduled Bank dinhmun hial hmu thei a lo ni ta a ni. Apex Bank thawktuten hlawhtlinna an chan theihna atana anhmahni dawrtu zawng zawngte hnenah thilung takin lawmthu an sawi a. Chief Minister leh Cooperation Minister te duhsaknaah lawmthu sawiin, RBI leh NABARD, Aizawl Regional Office-a thawktute leh Cooperation Department-a thawktuten tha thlah lova an thawhpaina leh duhsaknaah lawmthu an sawi bawk a ni.

Apex Bank thawktute chuan he hmasawna bung thar hmang hian Mizo mipuite tan Banking Service tha leh zau zawk an pek theih an beisei thu an sawi a. Apex Bank hian tun dinhmunah Branch 35 leh ATM 45 a nei a, Mizoram khawpui leh thingtlang hmun hrang hrangah an inzapharh mek a ni.



ELECTION

Naktuka West Bengal Assembly inthlan thawhkhatna leh Tamil Nadu Assembly inthlan vote thlak turin inbuatsaihna peihfel a ni tawh.

West Bengal ah chuan inthlan thawhkhatnaah Assembly bial 152 ah vote thlak a ni dawn a. Candidate hi 1478 an awm a. West Bengal Assembly inthlan thawhnhina hi April ni 29 ah neih leh a ni ang.

Tamil Nadu-ah chaun assembly bial 234 ah vote thlak a ni dawn a. Voter vaibelchhe 5 nuai 73 sing li sang 3 leh 291 ten thawkhata neih turah an aiawh roreltu an thlang ang.

.



PAHALGAM

Pahalgam firfiakte beih cham vawi khatna vawiin khan rampumah hriatrengna hun hman a ni. Nikum vawiin angah khan Jamuu & Kashmir-a Pahalgam-ah firfiakten pawisawi lo mi 26 an that a. He inbeihna rapthlak tak hi rampum bakah khawvel ramdangte pawhin an dem thu an sawi a. Sipaiten firfiakte chhanlet nan hian Operation Sindoor chu nikum May ni 6 leh ni 7 zana an thlak a. Pakistan ramchhung leh Pakistan Occupied Kashmir (PoK) ah firfiakte inkulhna hmun pakua an kap chhia a. He beihpui thlaknaah hian firfiak 100 chuang an thi a ni.

President Droupadi Murmu, Vice President CP Radhakrishnan leh Prime Minister Narendra Modia te chuan Pahalgam firfiakte beihnaa thi te hriatrengna hlanin firfiakte do kawngah chak leh huaisen taka hmalak zel a ni ang an ti.

Vawiin Pahalgam inbeihna champhaah hian Australia, UK, France leh Israel te pawhin kha inbeihna kha an hriatreng thu leh vanduaina tuarte an tawrhpu thu an sawi a ni.

